

Aalisarnerup nutarterniarneqarnera qanoq naammassiniarneqarnersoq pillugu apeqquaqaat aallaavigalugu oqallisissiaq.

(Inatsisartunut ilaasortaq Ane Hansen, Inuit Ataqatigiit)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Inatsisartunut ilaasortap Ane Hansenip aalisarnerup aaqqissuussivigeqqinnissaa Inatsisartuni oqallisigisassanngortimmagu Naalakkersuisut sinnerlugit qujaffigerusuppara.

Aammattaaq aalisarnermut inatsisip nutarteriffigineqarneranut atatillugu maannamut suliarineqarsimasut tullerriaarlugit nassuiaateqarfigimmagit Inatsisartunut ilaasortaq Ane Hansen aamma qujaffigerusuppara.

Aalisarnermik inuussutissarsiorneq suli nunatsinni pingaarnertut inuussutissarsiutaavoq sulilu ukiorpassuarni taamaattuarallassalluni. Aalisarnermik inuussutissarsiornermit avammut tunisinermi isertitarineqartartut ukioq kingulleq tre milliardit kr. angusimavaat kisitsisillu taakkua ukiuni tulliuuttuni aalajangiusimaniartussaavagut ajornanngippallu suli qaffassaqqillugit.

Aalisarnermik inuussutissarsiornermut atatillugu sapinngisamik annertunerpaamik ataavarnerusumillu isertitaqarfiusussanik isumaliutigilluagaasunik suliniuteqartoqarnissaa pisariaqarpoq, taamaalilluni nunatta aalisakkatigut pisuussutai sapinngisamik annertunerpaamik inuiaqatigiit ataatsimut isigalugit iluanaarutaasinnaaqullugit. Taamaattumik aalisarneq piujuartitsinissaq tunngavigalugu aammalu uumasoaqassuseq aningaasaqarnerlu eqqarsaatigalugit ingerlanneqartariaqarpoq.

Nalunaarutigisinnaavara, siunnersuuteqartup qulequttat eqqaasai pillugit Naalakkersuisut aalajangersimasunik suliniutigisassanik suliaqarlutik qangali aallartereermata, makkuusut: Kinguariit nikinnissaannut ajornartorsiutaasut, nunanik allamiunik piginnittoqarneq pillugu apeqquq, tulaassisussaatitaanermik atorunnaarsitsineq, pisuussutinik atuinermi akiuliuteqartarnissaq pillugu apeqquq, sinerissamut qanittumi avataanilu aalisartut immikkoortinnissaat kiisalu pisassiissutinit pigisat eqqarsaatigalugit taamaatitsisinnaanermi ilimasaarisarneq.

Kikkulluunniit nalunngilaat qulaani qulequttat pineqartillugit inuussutissarsiutillit tamatumani imminnut ungasittupilussuusarnerat. Naalakkersuisut anguniagaraat suliniutissanik sapinngisamik inuussutissarsiortut amerlanerpaartaannik ataatsimoortitsisinnaasunik saqqummiussaqaartoqarnissaa. Taamaalillutik Naalakkersuisut qulequttat taakkua allallu sulissutigineri ingerlateqqissimavaat, suli at ingerlanneqarnerini avataaniit siunnersorteqarlutik inuussutissarsiortut akornanni isumaqatigiissititsiniartussamik.

Suliniutigineqartussat taakkua suliarineqarneri suli sapaatip akunnialuini ingerlanneqarallarnissaat Naalakkersuisut ilimagaat, tassami illuatungeriit akornanni ataatsimiinnissaq tulliuuttoq påskip kingorna sapaatip akunnerata tulliani pisussaammat.

Naalakkersuisut maannangaaq qulequttanut aaqqiissutaasinnaasutut iliuserisinnaasanik saqqummiussaqaarusunngillat, kisiannili siunnersuuteqartutut aalisarnermi inatsisissap qanoq iluseqartinnissaa qanoq takorloorsimaneraat Inatsisartunut ilaasortat isumai tusarusullugit.

Naggasiutigaluguli oqaatigerusuppara, qulequttat taakkua Naalakkersuisut aaqqiiviginiarlugit suliarisaat aalisarneq pillugu ataatsimiititaliarisuup isumaliutissiissutaata suliarineqarnerani

immikkoortup aappaani oqariartuutigineqartunut assigummata. Ullumikkulli nassuerutigisariaqarparput aalisarnej pillugu ataatsimiititaliarsuup isumaliutissiissutaa ukiualuit matuma siornali tamanut saqqummiunneqarnikummat. Tamatumalu kingorna nunatsinni aalisarnikkullu pissutsit aamma allanngoriartornikuullutik. Maannakkullu aamma ilaatigut paasivarput, oliemik- aatsitassanillu qalluinernit suliffissat isertitassaraluillu naatsorsuutigisimasaraluagut, naatsorsuutigisatsinnit sukkanerusemik piviusunngunngitsoorlutillu ilaatigut piviusunngorsinnaassanngitsut.

Taamaattumik ataatsimiititaliarsuup sulinerata nalaani isumaliutersuutigineqartut ullutsinnut naleqqussarneqarlutik suliarineqarnissaat pissusissamisoornerusutut naleqqunnerusutullu Naalakkersuisut isumaqarfigaat.

Taamaammat aalisarnej pillugu ataatsimiititaliarsuup isumaliutissiissutaani innersuussutigineqartunit allaanerusemik ilusilinnik Naalakkersuisut suliniutigisassaminnik saqqummiussaqaarnissaat ilimagineqarsinnaavoq. Taakkulu Inatsisartut 2015-imi ukiakkut katersuunneranni saqqummiunneqarnissaat naatsorsuutigineqarpoq.

Taamatut oqaaseqarlunga oqallinnissaq Inatsisartunut ilaasortanut ammaappara aalisarnermillu iluarsaaqqinnissamut ilaasortat isummersornerata tusarnissaa qilanaaralugu.